

О Трито Послание е Јованескоро

Поздрав

1 ¹ О старешина џико мангло Гај, кас со мангавале ко чачипе. ² Мо мангло, мангава туке те овел туке шукар ко са хем те ове састо, сар со хем тано шукар тле душаке.

Пофалба баши сајгија

³ Уствари, бут радујнѓума кога але о пхрајља хем посведочинге баши тло чачипе, сар ту џаја ко чачипе. ⁴ Баши манге нае побари радост таро одова: те шунав дека ме чхаве џана ко чачипе.

⁵ Мо мангло, постапинеја верно ко са со ќереја баши о пхрајља, хем одова баши о јабанџие, ⁶ кој англи црква посведочинге тло мангипе: ка ќере шукар, ако испратинејален пало начин, сар сој тано достојно англо Девел, ⁷ соске путујнена баши Олескоро анав, на приминге ништо таро народиа. ⁸ Хем аѓар, амен сијем дужна те примина асавкен, за да те ова соработниќа баши о чачипа.

О билачхипа таро Диотреф хем о шукарипа таро Димитрија

⁹ Хем пишинѓум нешто е црквање, ама о Диотреф, кој мангела те овел прво машкар оленде, на приминеламен амен. ¹⁰ Одолеске ако авава одори, ка потсетинав баши олескере дејља, со ќерелален, нападинѓамен билачхе лафенцар, хем на задоволинелапе одолеја, него коркори на приминела е пхрален, а околнге кој мангена те приминенлен, забранинела ленге хем гонинелален тари црква.

¹¹ Мо мангло, ма углединтут ко билачхипе, него ко шукарипе. Кој ќерела шукар таро Девели тано; кој ќерела билачхипа, на дикхља е Девле.

¹² Баши о Димитрија синеле сведоштво таро сарине – хем таро коркоро чачипе. А хем амен сведочинаја; а џанеја дека амаро сведоштво тано чачикано.

Крајна поздравиа

¹³ Синема те пишинав туке бут, ама на мангава те пишинав туке мастилоја хем перо, ¹⁴ а надинавама дека ка дикхавтут скоро, хем ка ќера лафи усно. ¹⁵ Мир туја! Поздравиненатут о пријатејља! Поздравин е пријателен ко анав!